

## PRIMORSKO 2018

Primorsko scho zum 10. Mal  
isch wüerkli gsi ä gueti Wahl  
Hetisch du 9 Wiederholige erwartet  
wo du mit em erschte Grüppli bisch gschtarted?

Warum händ die Ferie scho 10 x stattgfunde?  
dänk wäg dine nette und treue Chunde!!!!  
nei nei.....mir chömed wäge dir und wäg em Schatz  
für eu Zwei gits halt kein Ersatz

Das 10. Jahr häsch alles müese gäh  
denn si händ eus im Hotel gar nid welle näh  
270 Pole seged da !!!!!!!!!!!!!!!!!!!!!  
drum chöned mir jetzt kei Zimmer ha

Uf das abe hämmer aagno s'Hotel sei proppevoll  
doch s'hätt gar nid so vill Lüt, s'isch richtig toll  
wahrschinli sind die 270 Pole uf Diät  
dass mer die nie im Schpissaal gseht

Es Riesepuff isch übrigens die Akunft gsi  
sooo vill Turische - doch die 270 sind nid deby  
Effizient sind's da am Zoll nid grad organisiert  
hätt au nid usgseh als wänn's dene pressiert

Als Überraschig bisch du eus cho abhole  
bisch glaubs froh gsi häsch ändli wieder chöne schnorre  
Mit villne Fläsche bisch du in Bus ie cho  
und d'Ruth hät au na de Baileys vüre gnoh

Ich bin grad hinder de Ruth gsässe  
drum hani ab dem Zitpunkt alles vergässe  
ich ha ghört mer heged na äs Lunchpäckli gha  
und de Pass heg au ich a de Reception gla

D'Zimmerverteilig häsch im Bus scho gmacht  
und dänn händ alli gseit „guet Nacht“  
nur du bisch nanig grad zum schlafe cho  
häsch dich na de erschte Problemlü aagno

Bisch au die ganz Wuche für eus ume grännt  
will mir öpis bruched oder uf Sozopol wänd  
um alles kümmerisch du dich „exemplarisch“  
bisch halt au di Einzig wo cha bulgarisch

Die Einte händ zwenig Bügel im Schrank  
anderi wächslet s'Zimmer wägem Gschtank  
än Chüelschrank wo heizt - än andere hät kei Strom  
und hüt chönds nid putze - villicht putzeds dänn morn

Putze tüends da übrigens ohni Suger  
aber wie bringt mer mit em Beseli än Teppich suber?  
dafür isch das Jahr kein WC Papier-Mangel aageit  
wahrschinli händs für die 270 Pole än Vorrat agleit

Du fahrsch extra uf Burgas in Lade mit de Druckerpatrone  
det muesch erfahre, dass da jetzt de Meister Proper tuet wohne  
all dä Stress nur zum eus d'Stepsheets übergäh  
damit mir über d'Nacht d'Tänz chönd durenäh

Ja bi dir isch alles in beschte Hände  
aber du häsch ja au schtudiert „Verkehr mit Fremde“  
Vill bringt di eigentli nid us de Rue  
und bi villem drucksch beid Auge zue

Nur 1 x hämer gseh wie du sprachlos bisch  
nämlü wo de Mario als Überraschig uftaucht isch  
de Bsuech vo dim jüngschte Spross  
hät Freudetränli gäh und im Hals än Kloss

Bi Sunneschy fahred mer Richtig Schloss und Sozopol  
anschienend isch's am Petrus nid wohl  
er schickt eus en chreftige Rägeguss  
d Gaby nimmt voll äs Schlammbad zu ihrem Verdruss

Au in Sozopol gits Lädeli zum shoppe  
da lönd mer eus nid so schnäll stoppe  
mit all dene Tüte gahts dänn zu Kafi und Chueche  
mir müesed ja unbedingt ä bulgarischi Spezialität versuche

Wie heisst die Turte wo mer unbedingt müend ässe?  
Die 5 Fraue mit Chopf-Rägeschirm händs vergässe  
sie meined er heissi „Tunnel Chueche“  
doch so öpis werdet's vergäbe sueche

Zum Glück bisch du da, chasch dene hälfe näbezue  
ja ja, s hätt scho öpis mit Dunkelheit ztue  
aber die Turte wo mer sich sött ine haue  
heisst GARAGE Turte liebi Fraue

mir händ die Wuche wieder gnosse, händs total luschtig gha  
händ uuusgibig glädelet und chli Levas dure la  
die Lädeli werdet eus vermisse  
mir händ ihren Umsatz scho chli ufe grisse

ich weiss nid öb die Lädelibsitzer verschtönd  
warum mir nüme uf primorsko gönd  
und au für mich ischs nid grad zum lache  
ich weiss nid was ich ohni mis Botox söll mache

Eusi Terrasse wird intensiv gnutzt  
und nach em Räge wird sie putzt  
wem tüend die sexy Underhösli uf de Leine passe ?  
si sind in dere Wuche - wohl wägem Dessertbuffet - gwachse

Ahh vom Tanze hani ja no gar nüt gseit  
bisch aber au chum emal ine gheit  
lang hani richtig müese fürchte  
du lieferisch kei Material zum dichte

Dänn häsch ä Mal die richtig Site zerscht nid gfunde  
und am Abig sind ä paar Schritt verschwunde  
zudem isch alles eifacher wämmer verschaht  
dass Din "Full Turn" RÄCHTS links umegaht

Dis Sexy Mikrophon bringt übrigens nid so vill  
dänn wänn du dich chersch isches still  
du erchlärsch am Wald dänn die nächschte Schritt  
aber mir überchömed das da hine nid mit

Dini VARIATIONE sind das Mal schpat cho  
Hütt sind dini Füess irgendwie nümmit cho  
obe häts gredt und une häts gmacht  
so wie obe Tag und une Nacht

Susch isch nur na öpis Chlises passiert  
wo mir ohni dich "Looking at the moon" händ repetiert  
händ die gute Tänzerinne de „Restart“ as richtig Ort here ta  
drum fangt de Tanz jetzt uf 3 Uhr neu a

Übrigens gits ja ganz unterschiedliche Schritt  
und mir wüessed dass es verschiedene Rhythmen gitt  
IM PRINZIP brucht mer's bim tanze..... oder ächt uf de Stäge????  
ich han gehört dir söll „slow slow quick quick slow“ öpis säge

Mariella, es isch eifach schön dass es dich git  
Han scho im erschte Gedicht gschriben du seisch än Hit  
du häsch vill zu eusne Erinnerung a Bulgarie bitreit  
s isch wieder emal Zyt, dass mer „danke“ sait

Das Jahr gits kei Charte sondern es Büechli mit Föteli drin  
und immer wänn's aaluegsch söll dir cho in Sinn  
dass mir dich gärn händ und d' Ferie mit dir immer super sind gsy  
.....doch jetzt isch halt Primorsko für de Momänt isch verby

Was immer naa chunt, mir wünsched dir Glück  
villicht chömed mer irgendwänn mit dir uf Bulgarie zurück  
mer gsehnd dich hoffentlich trotzdem wieder emal  
lass dir eifach namal säge „du bisch wunderbar“

und s gliche gilt au für d'Esther, din Schatz  
si übernimmt im Hindergrund en wichtige Platz  
natürli au für dich en grosse Dank für die letschte 10 Jahr  
dänn au du bisch eifach wunderbar